

Contohi China – Najib

Oleh LUKMAN ISMAIL

ALOR GAJAH 6 April – Datuk Seri Najib Tun Razak menggesa rakyat negara ini mencontohi China yang sanggup berubah menjadi lebih terbuka sehingga muncul sebagai kuasa ekonomi baru yang digeruni.

Timbalan Perdana Menteri berkata, tanpa melakukan perubahan termasuk bersikap lebih liberal dan progresif, tidak mungkin negara itu berjaya dan dipandang tinggi oleh negara maju.

“Kita tak boleh berpegang kepada pemikiran kita yang tidak ikut peredaran zaman dan era.

“Misalnya negara China sekarang tidak sama dengan 30, 40 tahun dulu. Orang China sekarang lebih liberal, terbuka dan

progresif.

“China akan mundur dari segi teknologi, dari segi keilmuan dan ekonomi kalau mereka masih bersikap tertutup seperti dulu,” katanya berucap pada majlis perasmian dewan orang ramai Machap Umboo, di sini hari ini.

Turut hadir Ketua Menteri, Datuk Seri Mohd. Ali Rustam, Ahli Parlimen Alor Gajah, Datuk Seri Dr. Fong Chan Onn serta calon Barisan Nasional (BN), Lai Meng Chong.

Dewan orang ramai bernilai RM1 juta itu kini dalam proses pembinaan dan sudah kira-kira 40 peratus siap.

Timbalan Perdana Menteri bagaimanapun berkata, kejayaan tidak boleh dicapai dengan kata-kata sahaja sebaliknya perlu bersandarkan kepada kesanggupan rakyat untuk berubah.

Um-7/4/2007

Tanpa melakukan perubahan termasuk bersikap lebih liberal dan progresif, tidak mungkin negara itu berjaya dan dipandang tinggi oleh negara maju

“Perubahan mesti bersandar pada kekuatan dalaman, berasaskan kerajaan yang makin terbuka dan agresif,” jelas beliau.

Najib berkata, sebagai contoh keadaan Malaysia 50 tahun lalu sangat berbeza - miskin dan tidak dikenali.

“Sekarang ini negara kita adalah antara negara yang pesat maju di kalangan negara membangun,” kata beliau.

Mengenai pilihan raya kecil Dewan Undangan Negeri Machap, beliau yang juga

Timbalan Pengerusi BN meminda pengundi menolak pembangkang yang hanya muncul pada musim pilihan raya.

“Cara (BN) berpakat cukup baik. Di Batu Talam kita bantu UMNO, di Machap... MCA, di Ijok pula nanti MIC. Itu kan cantik cara kita berpakat,” kata beliau.

Pada majlis itu, Najib turut mengumumkan bantuan tambahan sebanyak RM200,000 daripada kerajaan untuk pembinaan dewan tersebut.

**NAJIB
TUN RAZAK**
Timbalan
Perdana
Menteri